

BERITA ONLINE

UTUSAN BORNEO ONLINE

TARIKH: 21 JUN 2022 (SELASA)



Lapan MoU, satu pertukaran MoA dimeterai semasa IDECS 2022



Abang Johari menyaksikan pertukaran MoU antara wakil daripada Kerajaan Sarawak, SMA, SDEC, CENTEXS, SAINS dengan Microsoft (Malaysia) Sdn Bhd sempena IDECS 2022 hari ini. - *Gambar oleh Chimon Upon*

KUCHING: Lapan memorandum persefahaman (MoU) dan satu pertukaran memorandum perjanjian (MoA) dimeterai semasa Persidangan Ekonomi Digital Antarabangsa Sarawak (IDECS) 2022 hari ini.

Memorandum itu disaksikan Premier Sarawak Datuk Patinggi Tan Sri Abang Johari Tun Openg yang berlangsung di Pusat Konvensyen Borneo Kuching (BCCK) di sini.

MoU pertama dimeterai antara Lembaga Multimedia Sarawak (SMA) dengan Lembaga Teknologi Malaysia (MBOT) untuk kerjasama dalam menyediakan Sarawak dengan panel pakar teknologi bagi penilaian profesional dalam bidang teknologi masing-masing.

SMA kemudiannya memeterai MoU bersama Persatuan Juruteknik dan Teknologis Profesional (APTT) untuk kolaboratif dalam pembangunan bakat juruteknik profesional dan teknologi pembangunan ekonomi digital Sarawak.

MoU ketiga melibatkan SMA dengan Global Entrepreneurship Sdn Bhd (Startup Malaysia) untuk kerjasama dalam Program Keusahawanan Akar Umbi dan Literasi Digital.

MoU seterusnya melibatkan SMA dengan Petrosains Sdn Bhd untuk kolaboratif dalam kemahiran digital dan pembangunan bakat untuk Agenda Ekonomi Digital Sarawak.

MoU kelima melibatkan Kerajaan Sarawak, SMA, Perbadanan Ekonomi Digital Sarawak (SDEC), Pusat Kecemerlangan Teknikal Sarawak (CENTEXS), Sistem Maklumat Sains Sarawak (SAINS) dengan Microsoft (Malaysia) Sdn Bhd.

MoU yang ditandatangani ini bertujuan menetapkan rangka kerja, hubungan kerja dan komitmen masa depan kedua-dua pihak berhubung program pembinaan kapasiti.

Kemudian diikuti MoU antara APTT dan MBOT dan Pusat Kecemerlangan Prestasi Sarawak (SCOPE) dengan Asia School of Business (ASB), Teraju Bumiputera Corporation untuk kolaboratif sebagai Panel Pakar Teknologi (TEP) dalam bidang teknologi dan teknikal yang diiktiraf.

MoU ketujuh adalah antara APPT dengan MBOT untuk kerjasama sebagai TEP dalam bidang teknologi dan teknikal yang diiktiraf.

Seterusnya adalah MoU antara SCOPE dengan Asia School of Business (ASB) untuk kolaboratif mereka bentuk program kepimpinan transformasi digital untuk GLC dan sektor korporat.

MoU terakhir melibatkan SCOPE dan Teraju Bumiputera Corporation untuk bekerjasama dalam kelestarian korporat dan perusahaan digital.

Manakala pertukaran MoA adalah antara Universiti Malaysia Sarawak (UNIMAS), Universiti Malaysia Sabah (UMS) dan Universitas Mulia.

MoA antara tiga universiti ini adalah berkaitan pendekatan pembelajaran mesin untuk penyelidikan operasi, pendekatan berasaskan pengetahuan untuk pemahaman maklumat dan pendekatan pembelajaran mesin untuk penemuan dan ramalan pengetahuan.